

Simeoni: «Aurka-egile pentsaeran geratzen gara oraindik abertzaleak»

«Gatazkak lokarri koloniala eten arte iraungo du», dio Corsica Nazioneko buruak


Corsica Nazione abertzale batasunaren oinarri politikoak argi dira, hots, «kortsikar populuak ezagutua izateko eskubidea du eta nazioak burujabetasuna lortzekoa», Edmond Simeoni buruzagi nazionalistak berretsi duenez. Kortsikaren askatasun borrokaren berpizleatarik izan denak haxe iritzi dio, hala ere: «Helburua hurbiltzen ari zaigu, baina gu betikoz menderatuak egoteko zorian bagina bezala ibiltzen gara».

ALLANDE SOKARROS / BAIONA

«Nazionalistak Kortsikako Asanblean gehiengodun bilakatu bagina aurki, uste dut garaien honen neurria hartzeko eta lasterregi ez jokatzeko kontuz ibili behar genukeela», zioen Edmond Simeoni Corsica Nazione abertzale batasuneko buruak, 'U Rimbombu' astekariari berriki egin dizkion adierazpenetan.

Kortsikaren egoera larri eta korapilatsuak irtenbide lasterregiak ezinezkoak egiten dituela azalduta, Simeoni haxe gehitu zuen: «Gizarte guztiaren esku-hartzea bultzatuko genuke oinarriak berreraikitze eta edukia bermoldatzeko. Nazionalismoa garaile ateratzearekin ere, Estatuarekin itunketa berri baten negoziatzea nahitaezkoa litzateke».

Anartean, gaur egungo egoera aipatzean, Kortsikako abertzale historikoak zera esan du: «Gatazkak iraungo du lokarri koloniala



Kortsikar abertzaleatasunaren egoerak kezkatu egiten du Simeoni.

eteten ez den arte eta bi alderdien arteko interesak bermatuko dituen ituna negoziatua izango ez deino». Gatazka honetako indarkeria politikoaren kontuaz hitz egitean, Edmond Simeoni beti erran ohi duena azaldu du, hau da, «kortsikar populuaren interesak kontuan hartzearen ukatze historikoa, gizalagun arduradunen orde, jende menderatuak eragiten dituen klanismoa, horiek dira indarkeriaren sustraiak».

Egoera hori, gaitzespenek ez dezaketela konpondu azpimarratuta, buruzagi nazionalistak haxe gaineratu zuen: «Amaiera egokia izango da gure populuak bere eskubideak jasoko dituelarik eta mobilizazio zabalen bidez,

kolonialismoari porrot eginarazten ahal zaiola egiaztatuko delarik; alabaina, sail honetan Corsica Nazionek ez du bere eginkizuna betetzen».

GIZARTE DEMOKRATIKOA ERAIKI

Kortsikako abertzaleek betebehari oraindik ez gauzatzea, hone-lazaldu zuen: «Helburua hurbiltzen ari da aurki, baina orainokan ez dakigu eta gure jarrera politikoan ez dugu kontu hori geureganatzen. Gure pentsaeraz aurka-egile moduan geratzen gara, behin-betikoz gutxiengoan geratzekoak bagina bezala».

Hala ere, abertzaleatasunaren premiak, pertsonak, borroka bi-

✓ «Gaur egun, ez da sumatzen gazteriak gure herriaren kolonizazioa apurtzeko eta nazio moderno eraikitze-ko behar litzatekeen kemena duenik».

deak eta norberaren ohore goseak gaintzen dituela adierazita, Simeoni haxe zehaztu zuen: «Kortsikan, alderdi eta hautesmaila guztietan gizon eta emakume zintzo, ahaldu eta errespetagarriak badira, baina politika eredu, aldiz, hots, klanismoa, apurtu egin behar da eta bere orde gizarte aintzunt eta demokratikoa eraiki; ezen, klanismoak herriaren interesak saldu baititu eta demokrazia iraindu; sistema hau, beraz, ez da inolaz ere Kortsika berri eta arduradun baten proposatzeko eta eskuetan hartzeko gauza».

Bere eskuhartze politikoa aipatzean, eta batez ere, Kortsikako gazterien kontuaz bere iritzia agertzeko unean, Edmond Simeoni azaldu zuen «harro» zegoela, «beste askorekin batera, kortsikar gazterien kontzientzia hartzean parte bat edukitzeagatik». Baina sail honetan ere demagogia saihestu egin behar dela azpimarraturik, burukide nazionalistak zera gehitu zuen: «Gaur egun, ez da sumatzen gazteria honen baitan gure herriaren kolonizazioa apurtzeko eta nazio moderno eraikitze behar litzatekeen guratasun, kemen eta konpromezu nahikorik».

Juan Guerra hirugarrenez epaituko dute asteartean

SEVILLA

Juan Guerra hirugarrenez eseriko da etzitik aurrera Sevillako Entzutegi Probintzialeko akusatuen aulkian, oraingo honetan 'Comasa auzian' izan lezakeen erantzukizuna argitzeko. Aurreko bi epaiketetan bezala, aske geratzeko aukera guztiak ditu Juan Guerrak.

Asteartean hasiko den epaiketan, Esperanza Jimenez epaileak Construcción Modular Andaluza (Comasa) enpresak zebait agiri faltsutu zituenentz erabaki behar du. Faltsutze hori, Sevilla erdian luxuzko hotela eraikitze dirulaguntza publikoak jasotzearen egin zezakeen Comasak Juan Guerraren laguntzaz. Auzian, Juan Guerraz gain, Jose Garrido Lopez eta Francisco Lopez Martin, bere ohizko bazkideak daude auzipeturik.

Angel Marquez epaileak auzipetu egin zituen arren, fiskalak ez du inolako deliturik antzeman hiru akusatuen jardueretan. Epai-keta ostiralean amaitzeko asmoa dago. Asteartean bertan hasiko da akusatuen galdeketa, asteazken eta ostegunean deituriko 20 lekukoek deklaratu dute eta azken egunean akusazioak eta defentsako abokatuek beren ondorioak jakinaraziko dituzte.

Hiru gazte hil dira Galizian tren batek harrapatuta

LUGO

Hamalau eta 15 urte arteko hiru neska-mutil gazte hil ziren atzo Lugo eta Ourense arteko muga, Vigo-Bilbo ibilbidea egiten duen trenak harrapatuta. Gazteak txangoa egiten ari ziren Ourenseko Padre Feijoo ikastetxeko beste gelakideekin batera, baina galdu eta Os Peares eta San Esteban arteko tunelean sartu ziren. Orduan, trenak harrapatu eta bertan hil zituen.

Treneko gidaria ez zen istripuaz ohartu, tuneleko iluntasunak gazteak ikustea eragotziko zion eta. Goardia Zibilak berak eman zion Renferi gertakariaren berri. Hildako gazteetatik bi neskak ziren eta bestea mutila.

Oporraldiko bostgarren astea proposatu du Alberok ministroak lana banatzeko

ALACANT

Oporraldiko bostgarren astea proposatu zuen atzo Vicente Alberok Nekazaritza ministroak «lan sistemari korseta kentzeko». Oporren luzatzeak «15 egun segidan baino gehiagoko oporrak ez izatea» ekarri beharko luke, ordea, Alberoren ustetan.

Alacanten, Valentziako alderdi sozialistak (PSPV-PSOE) antolatutako hitzaldi batean egindako adierazpenetan, Nekazaritza ministroak bat egin zuen bere alderdiak martxoko kongresuan lan orduen murrizketari eztabaidatuko duen ponentziarekin. Alberok «logikotzat» jo zuen lanaldia murriztearen trukean, soldadak ere hein berean


jaistea. Ministroak gehitu zuenez, «gizartearen ongizatearen banakuntza konpetitibitatearekin bat etortzea beharrezkoa da».

Alberok hilabeteko oporren logika haustearen aldeko deialdia egin zuen, eta galdera bat egin zion bere buruari: «Hainbeste turista jasotzen dituen Espainiaren moduko herrialde batean, zer dela eta egon behar du hilabeteko oporraldia dena segidan eta gainera, abuztuaz?». Nekazaritza ministroaren arabera, oporraldiko bostgarren astearekin eta gehienez bi aste segidako oporraldiaren mugarekin, «ez litzateke lana hobeto banatuko, baina jende gehiago lanpeturik izateko aukera edukiko genuke».

Hitzaldi berean parte hartu

zuen Joan Lerna Valentziako Generalitateko lehendakaria zuhur agertu zen lan orduen murrizketari buruz, baina «jarrera itxia» izatearen aurka ekin zion, «lehiatzeko ditugun aukerak ikusita, ez litzatekeelako bidezkoa izango». Lermaren arabera, lan orduen gutxitzea sektorez sektore eztabaidatu beharreko gaia da, «sektore bakoitzak behar desberdinak dituelako eta irtenbideak pentsakera desberdinetik abiatuta hartu behar direlako».

Candido Mendez eta Julio Ruiz, hurrenez hurren Andaluziako UGT eta CCOOko idazkari nagusiak, ere prest agertu ziren lanaldiaren murrizketa eztabaidatzeko, herenegun Nicolas Redondo eta Antonio Gutierrez be-



Vicente Alberok.

EFE

ren buru nagusiek egin zuten moduan. Mendez eta Ruiz arabera, neurri hau krisiari irtenbide «kojunturala» aurkitzeko baliagarria izan liteke, eta Frantzia eta Alemanian ere eztabaidan dagoela gogoratu zuten.